

四庫全書

史部

欽定四庫全書

平定準噶爾方略前編卷五十三

乾隆十六年春正月戊申

諭安西提督永常等辦理準夷交易事宜

永常奏言準噶爾遣使額爾欽尼瑪入貢現已
至哈密伊等所帶人畜過多臣等援定例責拒
夷使等愧懼認罪遵受節制至乏弱牲畜俱照
上屆尼瑪數內懇求挑變挑剩者願即趕回不

敢例外干求並下次不以為例奏入得

旨永常所奏自屬辦理正道從來夷人貪利見小乃其常技我國家全盛之時施恩字小與前代和戎陋習迥殊駕馭遠人理應詞嚴義正方為得體前此夷使多帶貨物每藉口於未諳定制是以格外求寬今尼瑪自上次入貢已與申明約束現在復來充使更不得以未奉成約為詞宜及此時辦定成規以塞其無厭之請所有酌令按數變價及餘

數駁回之處著即照摺內所請據理妥辦不必因
意在柔遠過存遷就之見致啟干請之漸也尋陝
甘總督尹繼善奏報辦理上次貿易夷目所帶
皮張等項作價十八萬六千餘兩兌給內地紬
緞茶線等項作價十六萬七千餘兩外酌給現
銀一萬八千餘兩開具總數一摺得

旨尹繼善所奏準噶爾交易一事朕從前以為銀數
太多未免繁費不可不為樽節蓋我大清國勢強

咸許遠夷互市者不過寓綏懷之略而已其權操之自我非前代和親邊市可比即示之裁制亦屬當然今詳覽尹繼善所奏彼此原不過以貨物相準所費銀亦有限即令彼沾受微利感悅而去亦足見天朝字小之恩若照該督所定議單之數未免過於裁減如以為出自官商所定彼固未必遵信奉行即重以奏聞請旨彼亦必具奏懇求多費唇舌再或堅執成議令彼失所利賴設或鋌而走

險攘竊邊儲牛馬以激我興師其能置之不問已
乎偏師一出較之交易之費何啻十倍是交易雖
有小費所全實多朕意該督所定實屬過嚴難行
若定以此番交易為大局令其不出範圍或尚屬
可行俟彼使到日朕自酌量降旨傳諭再行傳諭
該督又朕觀準噶爾每次熬茶費至一二十萬金
似亦非仗此交易以濟其用即尹繼善所奏亦未
必如朕向所諭從國勢遠大起見或慮及該省一

時難於售變耳若然則何妨奏明折價以供賞恤
何惜此數萬皮張羊馬以安邊圉耶

戊辰

準噶爾部人鄂勒濟圖巴勒圖拜來降

命賞給安插如例

二月癸酉

命四川總督策楞等訓諭公班第達

上諭軍機大臣曰據西藏糧務通判常明等報軍機

處文內稱阿里地方與準噶爾接壤其原管轄之
清特古斯與朱爾默特那木扎爾同日被誅所遺
之缺公班第達選得集都鼐前往賞給卓里克圖
台吉名號等語觀班第達派人往阿里接管事務
即賞給台吉名號是儼然以藏王自居今令以公
爵管噶卜倫事又命多立數人以分其勢彼已大
失所望恐因此生心亦未可定著傳諭策楞等到
藏時留心觀看料伊此時斷未必敢顯有違抗但

其心稍不快足將來又恐積疑成釁外番詭譎多
疑竟須明切開導以從前朱爾默特那木扎爾因
有藏王稱號是以擁勢太重釀成嫌隙今之多立
噶卜倫正可保全終始令彼渙然疑釋庶可永寧
亦不必預設成見遽事猜防致伊又成一朱爾默
特那木扎爾轉於事理無益也尋策楞等奏班第
達恭順可信所有賞給集都鼐台吉名號乃係
達賴喇嘛以阿里地方緊要派往之人必須重

其名號是以權宜賞給臣等又將所奉

諭旨事理開誠曉諭班第達云朱爾默特那木扎爾
因恃有王爵肆行無忌是以致取重罪今

聖恩授爾為噶卜倫并多立噶卜倫正所以保全爾
身家子孫較封王之恩為尤重班第達聞之惟
有感激涕零自誓竭誠報効奏入報

聞

乙亥

命親王得親扎布為喀爾喀副將軍公策卜登扎卜
為喀爾喀叅贊大臣

命四川總督策楞等防範準夷通藏道路

上諭軍機大臣曰據班第奏言公班第達告稱有拉
達克汗書來稱近日準噶爾人從葉爾羌城至伊
處貿易詢問達賴喇嘛班禪額爾德尼安否并及
廣興黃教之事等語近日準噶爾每遣使奏懇差
人進藏朕俱不允前聞準噶爾進藏道路艱難若

不往迎斷不能到今觀準噶爾常差人赴拉達克
貿易則彼處自有通藏之路朕雖不准其進藏而
伊倘由葉爾羌城差人進藏則所關甚要將此事
寄知總督策楞等詢問達賴喇嘛與班第達凡準
噶爾通藏道路應行防範之處詳議具奏尋策楞
等奏言臣等詢問達賴喇嘛與班第達俱稱準
噶爾由葉爾羌城至阿里地方中間橫隔大山
水草甚少難以行走每年貿易人赴拉達克皆

有定數始准放入若大衆前來拉達克汗亦不許過即使前至阿里地方自阿里至藏尚有兩月路程亦不難於備禦又葉爾羌城有路可通魯都克地方亦須經過戈壁行走月餘現在魯都克地方常設卡倫至冬不撤至於各處卡倫嚴密連絡自咱拉山以外至拉卜賽那穆自阿哈雅克以外至順圖古爾等處亦屬通準噶爾之路今請將卡倫再行展放嚴加防範仍派諳

練扎薩克台吉前往巡查奏入報

聞

辛卯

命治朱爾默特那木扎爾妻子叛逆親屬之罪

上諭軍機大臣曰據駐藏副都統班第奏稱朱爾默特那木扎爾立心叛逆勾通準夷寄書前去私立假號種種背逆惡跡顯露等語從前駐藏大臣傅清拉布敦奏朱爾默特那木扎爾有猖獗之心斷

不可留請乘機擒翦朕尚意朱爾默特那木扎爾
未必至於此極令伊等詳察確實再行辦理嗣後
傳清拉布敦將朱爾默特那木扎爾誅戮朕猶以
伊等雖為國除逆要是並無籌畫草率舉事以致
捐軀今觀班第所奏則朱爾默特那木扎爾逆跡
已露實屬時不可待而傳清拉布敦即乘機辦理
可謂奮不顧身盡忠報國者矣前朕降旨以朱爾
默特那木扎爾之子達爾扎策凌年幼令解送來

京今朱爾默特那木扎爾背逆之罪既已顯著應
照叛逆之律辦理以為衆戒著將班第奏摺及朱
爾默特那木扎爾與準噶爾私通書札一併寄與
總督策楞等令其將朕此旨曉諭藏內之人將朱
爾默特那木扎爾之妻子即在彼處誅戮以彰國
法尋策楞等奏稱在江卡爾地方將朱爾默特那
木扎爾之妻子正法奏入報

聞

壬辰

授駐藏副都統班第都統銜

癸巳

準噶爾使臣額爾欽等進貢入

覲於蘇州

行宮

丙申

賜準噶爾台吉喇嘛達爾扎勅書

奉

天承運

皇帝詔曰據台吉奏請差人前往西藏喇嘛處遞贄
見儀懇賜恩准等語曩者爾故台吉噶爾丹策零
為父策妄阿喇布坦既歿奏請往藏熬茶策妄多
爾濟那木扎爾為父噶爾丹策零既歿亦以熬茶
奏請此皆欲追報先人是以俯從所請並加恩沿
途賞給牲畜路費特派大臣官員照管彼時朕即

降旨爾台吉因有此事朕方允行否則斷然不
許所降諭旨甚明今爾並非有如此大事何恩之
當報乃欲差人往藏耶不但無換一台吉即遣人
赴藏一次之理即中國亦豈有屢派官兵照管之
理耶爾所請遣人赴藏之事斷不可行至所奏喇
嘛學經一節因爾舊台吉策妄多爾濟那木扎爾
奏稱準噶爾地方所有西藏喇嘛大半物故懇准
少派數人至藏學經以廣黃教朕念差人至藏學

習則事不可行而爾地黃教就衰亦殊可念因為
爾等計中國大廟內原有自藏選來高僧是以許
爾處將可以學經之聰慧喇嘛或十人或二十人
送至京師習學數年而回可以闡揚黃教此朕念
和好日久周詳曲體之特恩初非勅令爾處夷人
來為僧徒也今乃謂爾處喇嘛未曾出痘不能赴
京學習懇將精通經典喇嘛准請四五人到爾處
教習夫學習文藝有就學無往教爾處既稱無可

赴京之喇嘛應即行停止今爾使臣額爾欽口奏
又謂台吉令伊等奏懇自藏延請四五喇嘛教習
數年再令回籍等語此又與爾奏書有異朕今念
爾護持黃教之意准爾所請令高等喇嘛前往教
誨但既命往之後爾毋得藉稱命往之喇嘛平常
捏詞再來瀆奏是以令爾使回巢後明白宣示爾
再遣使來請并將不行此等伎倆之處抒誠具奏
然後令喇嘛前往此亦有關中華聲教朕豈肯令

漫無德行不能訓導之人充數耶爾固不必慮此
再交易一事乃朕優恤遠方之大惠前既定以年
歲約以章程即當永遠遵照而近年來貿易者貨
物每次加增較前數倍邊疆司事之臣屢請駁回
朕念其攜貨遠來若不准銷售則虧損實多姑准
量為交易而該使該商皆謂不知從前議定成數
又謂非能自作主張歸當告之台吉伊等果歸告
與否固未可知然恃朕遷就加恩因而屢增無厭

將來必至定數之外一一駁令帶回而後已今特
明切曉諭嗣後肅州貿易毋得過乾隆十三年貨
物之數使臣前來以尼瑪上次帶來貨物為準如
逾此數即由邊境駁回不准貿易爾其曉諭使臣
商人等俾知敬謹遵行朕亦勅諭疆吏照此辦理
今後不得仍以不知成例為辭也

丁酉

申諭陝甘總督尹繼善準夷貿易事宜

上諭軍機大臣曰準噶爾夷人交易一事每歲加增
固屬無厭而為數太多亦屬難行前見尹繼善所
定交易之數較之上次未及其半伊等歷年已加
增至數倍何能強之驟減朕即料其未能奉行昨
召見夷使果稱總督曾有字來原非奉旨事理未
便遵行等語觀此則其不能遵奉可知朕今諭該
台吉肅州交易以十三年來數為準來使交易以
尼瑪來數為準不得出此範圍可寄知尹繼善令

其遵照辦理在此數內者許其交易多者駁令帶
回總在不離大數貨物內此多彼少許其折算相
當如此則伊等不致受苦其心自平而後來亦有
節制矣

三月庚戌

飭禁喀爾喀私與準噶爾回人貿易

先是定邊左副將軍親王成袞扎布奏稱喀爾
喀卡倫侍衛前鋒有私與準噶爾回人交易者

現在賒欠回人賬目多有未還致相爭論請將該侍衛前鋒等革職審擬定罪其坐卡倫之台吉內如有私自交易者亦革退審擬奏入得旨著嚴審究治至是成袞扎布覆奏私相貿易一事相沿已十餘年喀爾喀各旗俱有不止一案應請一併查究奏入

上諭軍機大臣曰前以私相交易一事所關甚大是以令成袞扎布究治今覽此奏則從前額駙策凌

在時已有此弊且各旗俱有並非僅此數人如將
伊等俱革退台吉訊究則獲罪者衆朕心實有不
忍著祇將此次發覺之案訊治餘皆從寬免究仍
徧諭喀爾喀之衆扎薩克蒙古等嗣後如再有違
例出境交易不獨將貿易之人治罪并該扎薩克
亦從重治罪斷不輕貸將此交與將軍參贊大臣
等不時嚴查禁止毋得怠忽

甲寅

定議達木蒙古歸駐藏大臣管轄

四川總督策楞等奏言臣等奉

旨令將達木蒙古歸駐藏大臣管轄並

命查玉暑那克舒番人應否亦令赴藏聽調查玉暑

那克舒一種番人離藏千餘里不但調至藏地

須料理養贍且恐啟唐古忒人之疑惟達木蒙

古自頗羅鼐奏准差派防範卡隘後遂不時選

調駐藏跟隨支領達賴喇嘛倉內口糧并有因

牛馬養贍而就食於藏地者前朱爾默特那木
扎爾就戮時跟隨之蒙古共三十餘人俱不敢
從逆各奔避原住之達穆地方甚屬恭順今令
歸駐藏大臣統轄易於料理查訊各蒙古頭目
亦俱願歸達穆住牧以聽調遣從前頗羅鼐父
子濫賞宰桑台吉等名號實屬僭越應照內地
之例編設佐領將現在頭目給以固山大名號
其下每一佐領再選派佐領一名驍騎校一名

照例一體賞給頂帶每年一次查考勤勞恭順者加以賞賚不守法度者分別懲革奏入

上從之

戊午

陝甘總督尹繼善奏撤西寧口外添防官兵

尹繼善奏言青海境外得卜特爾及伊克柴達木等處乃通準噶爾要路歷年派撥綠旗蒙古官兵分設臺站卡倫哨探瞭望上年九月內因

準噶爾夷人至西寧口外投誠誠恐無知逃竄
之人乘機擾我邊界防範不可不嚴是以添派
遊擊一員守備一員千總二員外委二員綠旗
兵一百一十名並令郡王索諾木丹津袞楚克
達什帶領蒙古官兵三百六員名同綠旗官兵
駐劄得卜特爾伊克柴達木兩處今準夷新立
台吉之後即遣使入貢甚為恭順且時值春融
已過防冬之候原設卡倫足資防範其添設官

兵自應飭令各歸本汛以省糜費奏入

上從之

夏四月戊寅

定議西藏分設噶卜倫四員公同辦事並

勅諭公班第達等

四川總督策楞等奏言臣等奉

旨令將藏地噶卜倫多立數人以分其勢隨密訪與
論舊例噶卜倫本屬四人一係公班第達餘係

策凌旺扎爾色玉特色卜騰布隆贊三人俱藏
內大族素為番衆所服內布隆贊雙目失明難
以錄用其策凌旺扎爾色玉特色卜騰皆老成
明白可勝噶卜倫之任應請仍放為噶卜倫至
布隆贊所遺之缺據達賴喇嘛以番衆不能深
曉黃教保舉喇嘛尼瑪嘉木燦明白可信臣等
擬請給予扎薩克喇嘛職銜放為噶卜倫公同
辦事奏入

上從之復

勅諭噶卜倫公班第達扎薩克台吉策凌旺扎爾色
玉特色卜騰扎薩克喇嘛尼瑪嘉木燦等曰西藏
廣興黃教為清淨善地達賴喇嘛掌管西方佛教
廣演經法從前供養喇嘛一切事務原係噶卜倫
四人至朱爾默特那木扎爾諸事專擅不與衆噶
卜倫商議負恩任性潛懷異圖因此駐藏大臣將
伊正法今藏內已經平靜噶卜倫事務不可一人

專辦特令總督策楞揀選賢能仍照舊例分設噶
卜倫四員公同辦事爾等當感戴朕恩尊敬達賴
喇嘛和衷協力黽勉供職勿存私意致生猜疑勿
分彼此互相瞻顧遇有緊要事務稟知達賴喇嘛
與駐藏大臣遵其指示而行爾等其感恩宣力副
朕興黃教安羣生之至意

癸未

定議藏地遣使入貢章程

四川總督策楞等奏言向例達賴喇嘛進貢正副二使俱係達賴喇嘛派遣自郡王頗羅鼐以來遂以正使為達賴喇嘛之貢使副使為該郡王之貢使今應仍照舊例正副二使均歸達賴喇嘛派遣其四噶卜倫所進丹書克即交該二使附奏奏入報

聞

定議仍設駐藏官兵及臺站事宜

四川總督策楞等奏言臣等奉

旨藏內仍須駐兵五百其沿途臺站亦應照數安設
妥協臣等現將所帶進藏官兵內照數挑選駐
藏其臺站各官兵向係遊擊一員守備一員千
把總十員兵一千名查舊設塘汛視地之簡要
定兵之多寡聲氣尚屬聯絡惟各汛兵丁半屬
老弱其故皆由向例三年之內遇有缺出該管
官即就近招募濫行充補所致今酌議拉里以

西離藏尚近如有缺出應聽駐藏大臣將藏地
可拔之餘丁驗補其拉里以東距藏較遠駐藏
大臣不能挑驗應令嗣後遇有缺出不准就地
招募即於下臺現兵內挨站遞行撥補將所遺
糧缺趲至打箭爐令阜和營遊擊於內地餘丁
選拔奏入

上從之

戊子

命立傅清拉布敦祠於通司岡

五月丙辰

命議藏地防範事宜

上諭軍機大臣曰頃準噶爾使臣額爾欽等稱伊新
台吉喇嘛達爾扎為王自策妄阿喇布坦以來皆
稱台吉並無稱王者朕已降旨詰責然觀其能使
屬下稱奉如此或尚係稍有才能之人不可不備
其窺伺凡我疆界益應嚴加防範前王保奏稱進

藏熬茶之人回游牧時俱出西藏喀勒占庫車卡
倫由阿哈雅克直入噶斯路而去自喀勒占庫車
至阿哈雅克其間並無卡倫因於綏安里瑪爾地
方添設卡倫四五處至阿哈雅克地方寬廣由噶
斯路而來直通西藏之喀喇烏蘇又與玉暑那克
舒番衆相近此阿哈雅克既係準夷抵藏之路似
應添設數卡等語將此寄知班第等令其與達賴
喇嘛及四噶卜倫酌量地勢詳悉密議以聞尋駐

藏都統班第侍郎納穆扎爾奏言臣等與達賴喇嘛傳集噶卜倫班第達策凌旺扎爾色玉特色卜騰尼瑪嘉木燦公同商議據稱本年各卡地方俱已添派兵役嚴固防範自喀喇烏蘇及穆什哲爾根綢安里瑪爾阿哈雅克等要地亦添兵駐劄再阿哈雅克路離藏遙遠今照從前準噶爾人前來之例自喀喇烏蘇以往至那克桑喀勒占庫車等處接連添設八臺以便送信

現在備辦亦極堅固可以無慮仍嚴飭巡卡之
扎薩克台吉等不時留心巡察俟大雪後撤回
奏入報

聞

閏五月甲午

命兩江總督黃廷桂調補陝甘總督尹繼善調補兩

江總督

六月癸卯

定議查核烏梁海出入卡倫事宜

定邊左副將軍親王成袞扎布奏言和托輝特
貝勒青滾雜卜公額林沁等所屬烏梁海住居
卡倫內外者原未禁其出入是以近日有賒欠
回人賬目等事敗露如再不定例行走日久恐
有夾帶蒙古出界往返貿易賊盜潛生等弊臣
等公同酌議每年遣往烏梁海徵差者青滾雜
卜旗人三十名駝不得過五十額林沁旗人十

名駝不得過三十每人騎馬二匹於遣往時將
數目呈報烏里雅蘇台參贊大臣給與出卡文
票再伊等所屬烏梁海內如有詞訟盜賊等事
須遣人辦理亦豫將遣往人數呈報請給文憑
至卡倫內外居住之烏梁海彼此往來從無文
憑但稟告卡倫侍衛台吉前往今若忽給文憑
恐愚昧之徒妄生猜疑請照前准其出入其遠
在卡外之烏梁海等前來謁見扎薩克帶來伯

勒克牲畜等物俱著卡倫侍衛查明呈報參贊大臣准其進卡至回歸時扎薩克酬賞伊等貨物亦將數目聲明移咨卡倫侍衛查閱放出惟不許將人口帶出至厄魯特貝勒彭蘇克公丹拜所屬烏梁海亦係青滾雜卜額林沁之屬下仍照前例准其進卡謁見如有帶來之物及賞賜帶歸之物俱交卡倫侍衛查閱呈報烏里雅蘇台參贊大臣奏入得

旨軍機大臣議奏尋議應如所請

上從之

甲子

準噶爾部人布圖遜布林特古斯來降

命賞給安插如例

秋八月乙未

準噶爾部人濟爾噶爾來降

命賞給安插如例

辛丑

陝甘總督黃廷桂奏預備明年準夷交易請仍

歸官辦得

旨允行

九月丁亥

申禁邊境私相貿易

上諭軍機大臣曰據定邊左副將軍親王成衮扎布奏稱準噶爾回人阿克珠勒等帶領四百人馬匹

牲口四萬餘至伊都克卡倫求告貿易因使侍衛
傅永等將禁止貿易之故曉諭又遣頭等台吉策
卜登與効力行走索拜帶蒙古兵前往禁止貿易
等語所奏甚是準噶爾詭詐難信禁止貿易之事
伊等非不聞知今復攜貨求售若以其遠來辛苦
恩准貿易伊等又習為固然嗣後更多帶貨物何
所底止且日久或致別生事端必當速為嚴禁可
寄知成衮扎布令其轉諭額默根明白曉諭回人

阿克珠勒等云準噶爾與我大國和好以來議定祇在肅州與京城兩處貿易後又歸於肅州一處並未曾在喀爾喀貿易之例爾等何得私帶貨物前來雖稱貿易已十餘年此皆下人私事亦從無數萬牲畜之多所有從前與爾等私相貿易之人已經查出治罪所欠之項亦已追出給還爾等豈得佯為不知自今以後不許再來貿易若因雪大難行暫准卡外過冬貿易則斷乎不可如此明白

曉諭只作成袞扎布之意不必告以諭旨再準噶爾之人詭詐多計觀其能帶大隊牲口前來豈不能令大隊人衆行走乎成袞扎布又一摺奏稱準噶爾烏梁海八十餘戶在卡倫附近游牧過冬請照例許其過冬回去等語由此觀之準噶爾之人明係習慣漸進今雖無事若任其如此日久恐致生事伊等漸次向內地游牧或窺探喀爾喀等游牧此等處不可不嚴緊防守先期預備各處卡倫

時加稽察可傳諭成衮扎布知之

庚寅

授安西提督永常湖廣總督以甘肅提督李繩武為

安西提督

冬十月甲辰

定議哈密防兵班滿回營敘勞擢補

調任安西提督永常奏言哈密防兵二年一次
更換伊等守卡瞭夜甚屬勤苦雖防所遇有缺

出原可擢補奈防員無幾經年不得一缺而本
營遇有缺出又以該兵遠在駐防不能擢補迨
至回營或所知之本官陞調他往新到之官不
知該兵之能否依然困於卒伍請照直隸官兵
派往北路軍臺之例於班滿回營時駐防哈密
總兵將各兵勤惰分別等第造冊移咨提臣核
實報部轉發各該營遇有缺出將頭二等官兵
以次與在營官兵相間擢補奏入得

旨軍機大臣議奏尋議應如所請

上從之

己酉

定議西路防範事宜

先是總督尹繼善自陝甘調任兩江來京

陛見

上命軍機大臣詢問防範準夷事宜尹繼善將應行

籌備各條具奏並請

旨交陝甘總督黃廷桂安西提督永常等再行悉心
詳議至是黃廷桂等密議尹繼善所陳各條及
籌畫未盡事宜具奏得

旨軍機大臣議奏尋議據黃廷桂奏稱哈密一帶城
堡現俱堅固所需兵民糧食亦俱充足以及嚴
飭卡倫晝夜偵探萬一有事堅壁清野務使賊
無所利並甘涼安肅備戰兵丁現皆一一挑選
精壯等條現在既屬有備應無庸再議其甘涼

安肅戰兵所需馬駝一條查善後原議每一戰兵給二馬四兵合給一駝每炮一位配駝三隻經尹繼善奏准將甘涼肅三標兵丁按照一兵二馬之數儘馬派兵遇調先行其餘戰兵不敷馬匹以駝二隻折馬五匹今黃廷桂等稱甘涼寧肅備戰駝隻經慶復減半奏裁之後不敷撥給酌將三標原定戰兵一萬三千名除駐防哈密外先派甘提標二千一百名肅鎮標二千名

涼鎮標一千九百名共六千名為首先應援一
應馬駝俱照原定數目預備再派甘提六百名
肅鎮四百名涼鎮一千名共二千名有馬則以
馬摘撥無馬則以駝折給以備二起出口在甘
肅二標馬駝可以通融數用涼鎮少駝一百隻
於甘標駝羔內揀補少馬二千匹將寧夏餘馬
儘數協濟外尚少馬九百五十八匹請於涼州
駐防馬匹內摘調再寧夏駐防馬駝別無動用

之處應請摘馬二千匹駝二百八十隻遇調時
即分解涼甘二標應用則涼甘二標又可各派
兵五百名其三千名均可隨後出口加之安西
戰兵三千名寧夏戰兵一千名共有一萬三千
名兵勢不少等語俱應如所奏辦理至所奏甘
涼肅三標不敷馬駝西寧固原河州已裁駝隻
應作何籌補俟明春另行妥辦一節查現據永
常奏稱安西提標於積年節省戰駝草料銀內

採買餘駝以備逾額倒斃屢歲買積及孳生駝
羔共有一千五百五十二隻除口老歲小不任
馱載外現有堪用駝六百二十八隻其駝羔漸
次長成亦可應用等語自可即於此項駝隻內
酌量撥補甘涼等處應交與黃廷桂等妥協籌
辦又固原等處不敷馬匹一條查固原戰兵二
千名需馬四千匹並折駝馬一千四百匹而該
提所屬止有馬四千六百八十四匹不敷馬七

百一十六匹河鎮戰兵一千名原派馬六步四
需馬二千匹並折駝馬六百八十八匹該鎮所
屬亦止有馬一千五百七十匹不敷馬一千一
百一十八匹今黃廷桂等稱固原戰兵依次出
口與首先援勦之師有間應量為變通每兵給
騎馬一匹二兵合給馱馬三匹並馱炮馬一百
五十匹共需馬五千一百五十匹除該提馬匹
儘數撥給外僅少馬四百六十六匹臨時可以

雇覓駝騾馱載運往不致有悞河鎮戰兵亦應
照固原戰兵馬匹之數將所有馬一千五百七
十匹先儘馬兵六百名足用聞調即行其步兵
四百名為數有限應請停派等語其量為變通
之處應如所奏辦理至固原臨時雇覓駝騾是
否可以尅期雇齊無悞軍行應令黃廷桂等臨
期妥協籌辦其河鎮步兵四百名既無馬可撥
且各路口兵丁足資策應應准其停派但善

後原議稱酌留甘標兵一千河鎮兵一千交與
甘提備用今此項步兵既經停派是河鎮兵已
不敷一千之數應令甘提於各標戰兵量撥足
數留以備用至所奏各路官兵一切賞給等項
令各州縣不拘何項錢糧臨時借動事後一併
報銷等語亦應如所請行又哈密卡汎一條據
稱天山西北之烏克克嶺正北之東大坂及東
北之河源小堡等處均可大隊行走今已挖溝

築柵勢難飛越其塔勒納沁距哈密二百餘里
向派弁兵駐劄但形勢頗低北山一帶由上摩
垓可遠至哈密城由坡子泉金鈎峽可直抵橋
灣瞭望俱不能及是上摩垓等處尤為緊要現
亦各設防卡等語防守已屬嚴密自可不致疎
虞但賊或虛張聲勢而內地援師不審虛實遽
往赴援又徒疲於道路應令密派幹弁務期偵
探確實勿致張皇錯悞又臨期用兵機宜一條

據稱哈密防兵專主堅守待援斷不致被誘輕
出如賊以偏軍綴哈密而挾大隊邀我安西援
師於中道我師不可輕敵必先據地勢然後相
機擊之否則速約續至各兵并力攻勦或分兵
繞赴哈密先襲其綴城偏軍使彼首尾莫顧我
乃前後夾擊等語計議頗為詳慎但防兵雖不
可被誘而有時機在可乘援師雖不可輕敵而
有時利於速戰情形難以預料惟在該督提等

審時度勢動出萬全庶可制勝又西寧赴援青海一條據稱青海蒙古逼近西寧設有緩急應照善後原議自西寧派兵或二千或三千赴援查該處實存馬三千八百三匹駝五百隻不敷撥用但西寧至青海不過百餘里倘有調遣自可輕裝前往毋庸多給馬駝應按現有馬駝通融預備馬步兵各一千五百名聞調即行等語應如所奏辦理至所稱以冬防為詞於西寧鎮

標內派守備千把四員帶兵百名前赴各處要
卡加意巡防偵探之處查青海之額率勒津及
伊克柴達木得卜特爾等處汎地遼濶原派駐
卡官兵每處不過數十人似屬不敷應照所請
添派鎮標官兵巡防偵探其過冬應否撤回仍
令該督提等酌量辦理奏入

上從之

十一月乙亥

駐藏都統班第侍郎納穆扎爾奏報拉達克汗
與達賴喇嘛致書回答情形

班第納穆扎爾奏言準噶爾遣使吹扎卜達爾
扎等十人到拉達克汗處通問在黃教寺中熬
茶探聽土伯特信息又稱欲於藏內延請喇嘛
難以前往求拉達克汗代向藏地請喇嘛數人
至拉達克地方再差人前來迎接達拉克汗因
致書達賴喇嘛將可否給與喇嘛之處請達賴

喇嘛指示達賴喇嘛告知臣等並稱已答回書

云我受

大皇帝恩甚重土伯特地方人衆皆仰賴

大皇帝養育今準噶爾欲請喇嘛若不奏明斷不可

遣往近奉

諭旨揀選藏內喇嘛進京甚衆伊等果誠心奏懇

大皇帝必然賞給等語臣等思準噶爾台吉喇嘛達

爾扎差人往拉達克探聽土伯特信息或因聞

朱爾默特那木扎爾受戮妄意機有可乘故藉
端探聽動靜拉達克部落弱小處於其間為之
通信亦其常事但恐為準噶爾所愚將緊要信
息透漏則大有關係臣等已令邊界卡倫嚴加
防範又令達賴喇嘛與噶卜倫等曉諭拉達克
汗諸凡見聞陸續報知藏內並賞給緞疋以示
獎勵奏入報

聞

癸未

定邊左副將軍親王成袞扎布奏報準噶爾內

亂情形

成袞扎布奏言據派出禁止貿易之驍騎校齊克慎等密報十月十四日有厄魯特庫本等六十人前來將貿易回衆及厄魯特人聚集於十七日黎明將回人庫楚克穆魯特等三十六人厄魯特孟克等十六人縛去我等將回人巴起

帶至喀爾喀副都統班珠爾家中設法詢問據
稱台吉喇嘛達爾扎夏間遣人往額爾齊斯地
方喚大策零敦多卜之孫達瓦齊達瓦齊不敢
去與台吉達什策凌烏巴什商議投奔

大皇帝定於九月十二日帶領妻子及屬下人來投
達什策凌烏巴什等暗將達瓦齊私謀告知喇
嘛達爾扎至約定日期達什等集兵五千將達
瓦齊屬下三千人擒獲一半並此處貿易內所

有達瓦齊之屬下人亦行縛去等語又詢問貿易來之厄魯特錫喇卜據稱聞今年秋間台吉喇嘛達爾扎差宰桑博和勒岱往喚達瓦齊議事達瓦齊不奉命喇嘛達爾扎遂遣博和勒岱鄂勒錐二人帶兵一萬往擒有人逃往達瓦齊處報信達瓦齊商議欲於九月二十六日前來投順

大皇帝後聞博和勒岱鄂勒錐帶兵將到遂於二十

二日帶兵五千行至和通哈爾垓地方被策凌
烏巴什領兵追戰策凌烏巴什戰敗猶帶領殘
兵尾追而博和勒岱鄂勒錐所帶萬餘兵在納
林布魯爾河阿爾台山梁邀截此時光景未知
如何等語臣等已令參贊大臣保德密諭各卡
倫一應瞭望巡察之處加意防範如有投誠前
來者酌量情形辦理奏入得

旨達瓦齊乃準噶爾大策零敦多卜之孫在彼處衆

台吉中較為强大今與伊台吉喇嘛達爾扎不合
前來投誠若論與準噶爾和好自不應收受然議
定疆界時並無彼此不留逃人之條且自康熙年
間以來收養此等投來之準噶爾人不知凡幾今
若不收達瓦齊等是絕伊歸路矣著寄信成衮扎
布等達瓦齊若投入我卡倫實係力窮懇求收養
可加恩給與口糧及騎馱牲口量為接濟照去年
薩喇爾等投來之例將達瓦齊及屬下緊要頭目

揀選數人先行馳驛送赴京師其餘人衆照例妥
辦候旨倘未入我卡倫之先豫使人來懇求接濟
則斷不可應付恐墮準噶爾詭計再此際達瓦齊
實係率衆投誠與否一得實信即行具摺奏聞

十二月甲辰

命副都統多爾濟往代班第赴藏辦事

丙午

諭安西提督李繩武辦理夷使交易事宜

上諭軍機大臣曰李繩武奏準噶爾使臣圖卜濟爾
哈朗到境日期一摺內稱今次所帶人畜數目雖
據稱不越欽定之例然或以多報少亦未可知現
在留心查察等語準夷交易一事每歲加增貪得
無厭前經尹繼善奏請定以數目未免過於減少
朕酌量加恩傳諭該台吉等嗣後肅州交易以十
三年來數為準貢使交易以尼瑪來數為準多者
駁令帶回今夷使所帶人畜貨物據報雖在定例

之內但夷情狡詐或以多報少臨時又再三懇求以圖例外多售亦所不免此番係定例後初次交易不可稍有遷就著傳諭李繩武即行查明夷使等所帶人畜貨物如在定例之內准其交易若有浮多一面先令貢使進京一面查明所多之數稟行駁回使該夷將來知所遵循不致妄生希冀尋李繩武又奏稱此次來使所帶人畜俱在前次夷使尼瑪數內惟駱駝浮多二十隻與從前所

奉此多彼少折算相當之

諭旨相符並擦掌之弱牲畜似俱應准其變售奏入
上諭軍機大臣曰據李繩武所奏是該夷等已知恪
遵朕諭不敢越例多帶矣其浮多駱駝既合之少
帶之數折算相當自應准其交易至擦掌之弱牲
畜即留之口外喂養俟其回巢時帶歸亦未為不
可何必定在哈密變售但為數無多需銀不過二
千餘兩此次該提鎮等既循往例代為售變亦姑

照所奏辦理然究屬不在額數之內者總之夷性狡詐不足深信或因此次定例之初故為恭順以相嘗試將來又復逐次增添亦未可定向來緣營習氣多圖遷就了事此次夷人交易必應明白曉諭示以節制俾其懷德畏威方為妥協若一味委曲周旋致夷人不但不知感激且窺測該提鎮等有畏彼之心則大不可矣著一併傳諭知之

平定準噶爾方略前編卷五十三

欽定四庫全書

平定準噶爾方略前編卷五十四

乾隆十七年春正月乙亥

準噶爾使臣圖卜濟爾哈朗等入貢

準噶爾台吉喇嘛達爾扎奏言前遣使臣額爾
欽尼瑪將前往西藏聘請喇嘛之事具奏蒙

大皇帝恩准於再遣使臣入貢時延請有德行喇嘛
四五人前來教誨衆喇嘛不勝感激令遣使臣

圖卜濟爾哈朗進貢並延請喇嘛仰懇

聖恩俯准於胡土克圖三人內恭請一人於推廣黃

教實有裨益併祈仍照前奏許令我處遣人輕

騎減從前往西藏為我先人設懺進供所有沿

途派撥官員兵丁照看等事雖覺繁瑣但已蒙

加

恩和好而遣往之人為數無幾尚屬易行使遠近聞

之無不仰慕

大皇帝之盛德其貿易之事令使臣口奏奏入報

聞

甲申

命尚書舒赫德侍郎玉保赴北路軍營會籌防範準

夷事宜

定邊左副將軍親王成袞扎布奏言據卡倫驍
騎校齊克慎報稱準噶爾宰桑瑪木特等遣人
前來告稱本處台吉達瓦齊作亂在納林布魯

爾地方被我兵殺敗達瓦齊與阿睦爾撒納等
十二人逃出不知去向是以我台吉命阿爾台
等處游牧宰桑三人帶兵往烏蘭大坂努克穆
隆都什托羅海華碩羅圖洪郭爾鄂隆舒魯克
圖得樓等七處隘口駐劄以防達瓦齊與阿睦
爾撒納遠遁恐各卡倫疑我無故動兵特來告
知等語又奏據蒙古管旗章京莫尼扎卜前往
烏梁海確訪信息有準噶爾人至烏梁海探親

告稱達瓦齊於去年九月內與台吉喇嘛達爾
扎有隙私與台吉達什阿睦爾撒納班珠爾策
凌沙克都爾等商議投順

大皇帝其後達什沙克都爾反將商議之事告知喇
嘛達爾扎即帶兵追趕與達瓦齊戰敗而回達
瓦齊又與阿睦爾撒納班珠爾等商議若投中
國恐阿爾台地方有兵堵截地狹難過因向額
爾齊斯前赴哈薩克等語奏入

上諭軍機大臣曰準噶爾向多詭詐伊等如果慮達
瓦齊逃竄不過派兵防守足矣今反遣人來告殊
屬可疑此或伊等恐我處生疑故為安慰却暗行
譎詐猝然闖入我境亦未可知聞喀爾喀將牧多
有距卡倫甚近者今若不豫籌防範恐賊人一旦
竊發不暇向內收移將反令其得利所有附近卡
倫之喀爾喀將牧應早令收入腹地地方妥然此時
遽使移徙又不免起衆人驚疑且或賊人聞知轉

以我為畏懼此中宜緩宜急應如何熟計妥辦甚
關緊要今派尚書舒赫德侍郎玉保前往軍營查
看軍容器械著傳諭成衮扎布俟伊等到時會商
密議務期籌畫盡善定議具奏

戊子

命駐藏都統班第等防範準夷窺藏

上諭軍機大臣曰此次準噶爾台吉喇嘛達爾扎奏
請三事朕俱未准行看來喇嘛達爾扎並非為推

衍黃教其意以為不准請胡土克圖或准其遣人
至藏耳昨準噶爾會向拉達克汗轉求達賴喇嘛
遣一大喇嘛前去達賴喇嘛未曾給與今或因朕
不允所請復囑拉達克汗轉求達賴喇嘛亦未可
知應將情由預告達賴喇嘛俾得臨時回答準夷
使臣又奏大皇帝若以我等入藏派兵護送為煩
請以已力前往則伊且將借端圖謀藏地妄生事
端班第熟暗藏地情形當預為籌畫準噶爾通藏

道路何處近易何處險遠倘有用兵之事應如何
添設卡倫遣兵堵禦著班第納穆扎爾妥商定議
多爾濟到時亦易遵行倘準夷來犯藏內之人或
不能支應將達賴喇嘛如何移駐秦寧之處亦宜
預計再班禪額爾德尼所住扎什倫布地方準夷
若來有無干礙班第等務籌萬全勿稍疎漏慎之
密之

尋班第納穆扎爾議奏所有預籌準噶爾請喇

嘛一事已諭達賴喇嘛令其先備回覆之言至
準噶爾通藏隘口係阿里那克桑騰格里淖爾
阿哈雅克四路惟那克桑一路稍近現已展放
卡倫至從前準夷犯藏係由拉卜賽那穆一路
然多戈壁難行故彼時由勒底雅路逃走年餘
搶掠拉藏汗牲畜始能接濟到藏今亦於此路
展放卡倫倘有賊踪即速報信一面派兵抵截
一面移徙游牧自不使賊得利又拉達克至阿

里之路亦近但拉達克與準噶爾往來貿易人
數無多若遣大兵必不許其入境如不由拉達
克地方從葉爾羌城亦可通阿里然其中有
山障隔且水草少而戈壁多自阿里至藏尚有
兩月路程一得賊信可以備禦惟騰格里淖爾
阿哈雅克兩路較為寬濶今亦俱展放卡倫晝
夜瞭望不致疎懈臣等與噶卜倫等商議據稱
一應卡倫俱極嚴固無庸添設土伯特人雖怯

懦自頗羅鼐以來操練熟習現有馬兵萬餘步
兵一萬五千有餘若準夷從阿哈雅克騰格里
淖爾而來則令策凌旺扎爾領蒙古唐古忒兵
抵截調功布達克布等處兵接應從那克桑阿
里而來則令色玉特色卜騰領附近兵抵截調
阿里等處兵接應班第達及尼瑪嘉木燦留藏
保護達賴喇嘛至班禪額爾德尼所住扎什倫
布地方去前藏七百餘里自阿里至前藏亦沿

扎什倫布之邊而行若當用兵則令其移至前
藏與達賴喇嘛同住可以無虞萬一準夷傾部
而來土伯特有不能堵禦之勢臨期相機而行
一面將達賴喇嘛及班禪額爾德尼護送至泰
寧一面令駐藏官兵協同唐古忒等兵併力守
住山險以待川兵入藏應援亦可無慮奏入報

聞

己丑

命黑龍江將軍傅爾丹密籌預備戰兵

上諭軍機大臣曰達色現已調補齊齊哈爾副都統
著傳諭達色速赴新任即密告將軍傅爾丹今準
噶爾台吉喇嘛達爾扎以達瓦齊逃走派兵駐我
邊外又本年來使奏請諸事朕俱未准行恐不無
藉端生事擾亂喀爾喀游牧朕特派大臣往北路
軍營稽查卡倫此時雖並無形跡萬一有事朕欲
調發黑龍江之兵二三千名傅爾丹宜密籌預備

令五日內即可起程方安然此特為萬一有事是以先期備辦並非立即用兵也切不可聲張轉致擾惑衆心尋傳爾丹等奏言齊齊哈爾黑龍江墨爾根呼倫貝爾等處本有額設兵七千餘名此內可挑選二千再打牲索倫達瑚里等處丁壯七千餘人此內亦可挑選一千官兵俱有器械其無器械之打牲索倫等查有從前調往金川時所給兵仗撤兵後俱繳回收貯可以給發所

需銀兩口糧於現貯倉庫內支給臨期可以速
發無悞奏入報

聞

二月甲午

賜準噶爾台吉喇嘛達爾扎勅書

奉

天承運

皇帝詔曰據台吉奏懇准於胡土克圖三人內延請

一人前往爾處推演黃教並懇准爾處遣人至藏
進供等語去年爾使額爾欽來以延請喇嘛之事
具奏朕已明降諭旨我中國胡土克圖三人及有
德行喇嘛俱有教習學藝之事不可遣往但朕不
忍令爾處黃教滅絕故特許於西藏揀選有德行
喇嘛到京俟爾再遣使來准令請往是時降旨後
朕即令達賴喇嘛揀選精於經咒可以推行黃教
之喇嘛十人送至京師今爾乃不遵朕旨反以斷

不可遣往之胡土克圖為請是爾並非真心推衍
黃教可知況西藏選來之喇嘛爾來使亦曾會面
以未奉爾命不敢延請朕自去年即挑藏內喇嘛
至京以待爾之延請今爾使既至又不請往是爾
原無請喇嘛之意今并此喇嘛十人亦不遣往矣
至爾奏遣人至藏一事去年爾使臣額爾欽來時
以爾襲位為辭朕既降旨必無換一台吉即差人
進藏一次之理今來使又以追報爾父噶爾丹策

零為辭果爾則從前策妄多爾濟那木扎爾已經
為爾父熬茶一次安得今又差人前往設有子十
人將十次差人進藏乎來使又奏使臣來往請不
限人數肅州貿易牲畜內不好者准其售賣等語
從前我大臣與爾使臣哈柳定議有事差人不攜
買賣後因每次遣來使臣俱托言預備口糧攜帶
貨物漸漸加增本應不准貿易勒令帶回朕因和
好是以施恩來使令照尼瑪所帶貨物為准其人

數若不限定日久亦難遵行故亦令以五十人為
准至肅州貿易復加恩准照乾隆十三年最多之
數貿易一節原係小人謀利之事爾等攜來不堪
之物慮我中國之人不用若我中國之人將不堪
之物給爾等爾等肯受乎此事瑣屑朕所不問即
我封疆大臣亦不屑辦理爾何必以此瀆奏來使
又以逃來之薩喇爾賜回為請薩喇爾雖來自爾
處實因懼禍逃生朕為天下大皇帝以生成衆生

為本豈肯轉置之死地況我中國逃生爾處如羅
卜藏丹津者甚多若一一索取不可勝計朕並不
索取一人即爾送至朕亦不受朕以為既往之事
不忍深究爾反求給回甚屬錯悞爾若念爾父恭
順和好年年遣使請安受朕恩典事屬可行若以
此等斷不可行之事瀆奏究屬何益是以特降勅
旨令爾使圖卜濟爾哈朗賫歸諭爾知之

壬寅

授公策卜登扎卜為扎薩克並給予印信

丙辰

駐藏都統班第等奏報布魯克巴莫長進貢

上諭軍機大臣曰據班第等奏稱布魯克巴之額爾
德尼第巴博羅特色勒都卜聞朕加恩於達賴喇
嘛撫定土伯特衆生抒誠內向進貢方物等語布
魯克巴乃遐荒部落聞朕安撫西藏衆生傾心悅
服奏請朕安甚屬可嘉著施恩賞賚以示褒獎

三月乙丑

命尚書舒赫德等議北路防範事宜

舒赫德玉保成衮扎布奏言臣舒赫德等至軍營與臣成衮扎布謹遵

諭旨以準夷說詐難信恐其猝擾我邊隨將各項應行預備事宜密商定議臣等查喀爾喀極西之游牧本在內卡之內四五百里後因與準夷和好奏明在內卡之內百餘里游牧將軍及叅贊

每年至青草發生時又令向內收移二三百里
此係向例所行今但須於收移時令較前更加
向內自不至於紛擾至備兵一事定例每年鄂
爾昆一千烏里雅蘇台一千俱係常駐其防秋
兵二千每年六月初十日至塔米爾城九月初
十日撤回游牧又恐此四千兵力尚單故喀
爾喀四部落另有備用之兵扎薩克圖汗部落
一千賽音諾顏部落二千車臣汗部落四千圖

謝圖汗部落三千共兵一萬以為救援之用此
項兵丁距大營及烏里雅蘇台近者不過數日
遠亦不過十餘日俱可趕赴每年無事時原在
各本游牧處推演以備叅贊三年一次查閱今
年雖非查閱之年可因新換叅贊特行查閱一
次嗣後查閱時令於七月初旬各在指定地方
多演數日始行撤散此皆就每年成例內酌量
備辦既不至紛擾目前而萬一有事亦足抵禦

又奏現今準噶爾宰桑瑪木特等遣人稟稱伊
台吉令將堵截達瓦齊之兵撤回即日起程各
回游牧等語奏入

上諭軍機大臣曰準夷卡兵撤回目前雖覺無事然
保無外示和好來去報明使我不疑至秋又借堵
截逃人之名駐兵邊上妄生窺伺成衮扎布等不
可因其撤兵遂致疎懈倘今秋又來駐牧即大有
可疑當一面備所當備一面遣人諭以原定之約

決意逐回著傳諭舒赫德玉保成衮扎布等將伊
等復來駐兵應如何逐回萬一有事應如何備禦
使喀爾喀不至被累之處悉心密議具奏尋舒赫
德玉保成衮扎布等議奏喀爾喀扎薩克圖汗
與賽音諾顏此二部落游牧正當西境係準夷
來路請自今年六月起於卡倫內以一千五百
里計將錫喇烏蘇取中東至齊得爾布克隨喀
喇塔勒之啓里穆圖西至麻喇勒圖拜達里克

伊克鄂拉等處以內令其游牧內卡共十六處
每卡住兵二十戶至秋時每卡只留十人其家
眷牲畜俱令移於烏里雅蘇台軍營附近游牧
俟阿爾台山梁雪降後再回至此二部落所預
備之兵三千名秋間應令叅贊達青阿帶領與
喀爾喀副將軍得親扎卜叅贊貝勒額林沁同
赴錫喇烏蘇駐劄為烏里雅蘇台援兵兼可壯
塔米爾大營之聲援其鄂爾昆駐防兵一千應

與防秋兵二千合在一處臣成衮扎布與叅贊
阿巴齊得寧帶領在塔米爾相近形勝之地駐
劄至圖謝圖汗部落預備兵三千今秋令在鄂
爾昆駐劄又哲卜尊丹巴胡土克圖所住庫倫
地方關係甚要應將車臣汗部落預備兵四千
令副都統巴爾品帶領在巴顏烏蘭駐劄既可
接軍營之力而距庫倫甚近又可保護胡土克
圖萬一有事一面將胡土克圖移至多倫淖爾

一面即帶兵前赴軍營以候調遣如此預備後
倘秋間準夷復來卡外居住臣成袞扎布即遣
曉事識路之章京莫尼扎卜與副都統敦多克
前往明白曉諭責以原定之約不准居住務必
逐回一面由烏里雅蘇台駐劄兵內揀選二三
百名委員帶至準夷接界之地護守卡倫萬一
有事即收卡至烏里雅蘇台會同烏爾登量賊
之勢可戰則戰倘賊人勢衆力强驟難抵禦而

喀爾喀游牧早已移入在內不慮侵掠即令烏爾登等將賊引至西喇烏蘇會合達青阿之兵相機剿殺賊至此已行二三百里人乏馬疲深入重地我以逸待勞又有塔米爾鄂爾昆之兵接應賊衆自不得利總之賊敢深入我境者必恃搶掠游牧以接其力今我既行清野之法又厚集堅兵以待之自居必勝之勢又六會盟處所備之兵與綏遠城右衛土默特及察哈爾八

旗兵丁從前原議定軍營有事准其奏調又喀爾喀東與黑龍江接壤黑龍江等處兵亦可調用萬一有事將軍一面具奏一面行文各該處調取應援如此妥協預備準夷自不能得利奏入報

聞

夏五月壬申

諭陝甘總督黃廷桂安西提督李繩武辦理準夷貿

易事宜

上諭軍機大臣曰李繩武奏此次準噶爾夷目額倫瑚里等所報貿易之牲畜貨物合算較十三年之數不無浮多再每次夷人到哈密必有擦掌乏弱牲畜求售應俟該夷到哈密後查明確數以理責問如果恭順懇求再行照例辦理等語此番交易係初次定例必當示之以信不可稍有遷就在該夷貪狡無厭不過得尺進尺得寸進寸向來承辦

員弁惟恐生事一味委曲周全將就了事而於奏報時則又稱夷人如何哀求如何苦訴究其實何嘗有是徒粉飾以美觀聽耳朝廷體制尊嚴邊疆奏事有不能盡實而外藩小國其上下之情轉相聯貫交易一事未必不早為所窺破一次踰例後次又復加增厚利所在彼何樂而不為耶今該夷內亂之餘又與哈薩克構釁其交易較前所增有限已可得其情形此正辦理機會總當悉遵前旨

在十三年定數內者許其截長補短通融折算逾數者雖少亦槩駁回至奏報來使言語情形務須一一據實倘稍有粉飾將來查出惟該提督是問將此傳諭黃廷桂李繩武知之尋李繩武將夷目言語情形具奏

上諭軍機大臣曰李繩武所奏看來竟是毫無主見而姑為游移兩可之詞以俟朕之批示如所稱該夷等似覺失望又不敢違背章程其詞色深為作

難是以止求轉奏等語又將夷人伴送北山暫住
收放是已明示以據情入奏矣貿易一事既經定
有章程自當永遠遵行若因其恭順畏懼而曲為
遷就將來勢必逐漸加增何所底止至疲弱馬駝
如果實在難行自可留哈密收放從前准其變售
原屬辦理錯悞今既立定限制何得尚復因循故
轍視為常例乎李繩武具摺奏請夷人必無不知
之理茲反不必游移遷就致令夷人窺笑其底裏

也著即將入奏奉旨之處明白宣諭以哈密貿易
原屬非例今既新定規模當即按照十三年肅州
貿易之例永遠遵守其疲乏牲畜不妨在哈密留
人牧放回巢日攜回此事必須如此辦理方可以
杜無厭之請在李繩武本非辦事果斷之才但身
為提督於此等重務一味周章觀望將來何以承
受恩典著嚴行申飭

戊寅

諭安西提督李繩武等巡查哈密事宜

上諭軍機大臣曰李繩武奏巡查哈密情形一摺稱現在籌辦築牆添柵等語所謂知其一不知其二防邊飭備固保境之常經但目今貿易夷人正到哈密彼惟利是圖此時斷不敢冒險無可防範而從前夷人到哈密時從未見提臣親臨其地今見李繩武已不免驚疑又聞築牆添柵彼不知巡邊常事必且多方疑慮况提臣甫回督臣又往不審

天朝意欲何為回巢傳播或更繕兵設備啓彼此
相疑之端甚非所以安夷心而靖邊圉也著速行
傳諭李繩武所籌辦築牆添柵等事此時竟可不
必辦理如必須添設亦俟交易事竣夷人回巢後
緩圖之黃廷桂另有旨諭并諭李繩武知之又

諭軍機大臣曰前據黃廷桂奏明巡查安西哈密一
帶邊境乃按例應行之事但未籌及本年正有夷
人來境貿易現在李繩武已巡至哈密乃提督甫

回總督又至交易夷人從未見如此不且起其驚
疑乎著速諭黃廷桂祇須巡至甘肅不必前往哈
密如已經將到不可中止亦即據實奏聞向來邊
疆事宜總不肯將實在情形據實入告若謂本欲
辦理又因奉旨中止行令沿邊將弁勿致聲張伊
等必聲張更甚此處殊有關係不可稍存粉飾并
諭黃廷桂將奉旨後實在情形即速奏聞

戊子

命副都統舒泰往代納穆扎爾駐藏辦事

六月甲午

準噶爾部人呢雅斯來降

命賞給安插如例

癸卯

命削安西提督李繩武職以涼州將軍綽爾多為安

西提督

上諭軍機大臣曰李繩武辦理夷人交易一事張皇

無措所奏俱非實情即如令夷人在山北居住明
係伊一無定見候朕批示而反奏稱夷人懇求在
山北緩收將息且又留住黃廷桂候伊摺回同辦
其失措已極此貿易小事尚如此取巧設有不測
軍情其何能勝任已有旨革職令將軍綽爾多補
授安西提督綽爾多於夷人交易諸事從未經歷
其輕重緩急之宜著黃廷桂一一告知令其隨機
籌辦務遵前旨照十三年之數不可稍有遷就尋

又

諭軍機大臣曰前因李繩武於夷人貿易一事周章
觀望毫無擔當是以降旨革職令淖爾多往代其
任淖爾多到時自當遵照新定章程不容稍有遷
就但亦不可因李繩武以此獲咎遂爾矯枉過正
使該夷等至於難堪向來綠營習氣惟事因循及
一經嚴飭往往又過於苛急皆非酌中辦事之道
總之駕馭外夷當使之知畏亦當使之知感可傳

諭淖爾多知之

秋七月甲子

諭陝甘總督黃廷桂防範準夷事宜

上諭軍機大臣曰黃廷桂奏稱夷人交易俱已遵旨如例現在定期過山等語夷人貪得無厭必當示以節制今既將浮多牲畜貨物駁回夷人俱遵奉約束已得天朝控馭之體所有伊等應得貿易利息及本分賞賜觀瞻所係雖不必加厚亦不可矯

枉過正故為裁抑前經將此意傳諭淖爾多今黃
廷桂兼理甘肅巡撫皆伊任內所應辦之事當酌
中區畫務令輕重得宜至夷目阿卜都勒患病回
巢未必非將現在辦理情形告知伊台吉是以托
故先回欲於貢使未起程之前抵該部落耳其求
醫診視正欲使知邁疾非虛以掩先回之迹皆其
詭詐伎倆無足言者邊防宜加整飭但當不動聲
色密為防範夷商數百人耳目窺伺不可稍露形

迹致駭觀聽以啓其疑黃廷桂當善體此意新撫
鄂樂舜到甘肅併將此諭知之

冬十二月丁酉

命京口將軍王進泰為安西提督綽爾多補授黑龍

江將軍

癸卯

議塔勒納沁防卡事宜

安西提督綽爾多奏言哈密依山據險卡倫密

布有事固守實同堅壁惟東北之塔勒納沁僅恃河源小堡之卡倫而河源小堡地處山凹不能遠視且更在塔勒納沁東北五十里止設千總一員卡兵五十名而又分佈於鶯膀山三道大坂舒魯松卡等處此三處卡兵每年九月初一日冰雪深厚不能往探即撤歸河源小堡倘準夷由上下摩亥等處潛來河源小堡已隔賊人之外似非動出萬全而塔勒納沁地方山既

重疊參差徑復四通八達夜行晝伏隨處易以
潛形水廣草肥大隊儘堪容納況山頂之東西
大坂等處皆屬以高臨下瞭望最遠每年夷使
及貿易夷衆往返經由亦素知卡倫嚴密必不
敢從此路而來是以臣不得不於塔勒納沁
總過慮應請將三堡額駐兵五百名內撥出一
百名再於哈密存城兵內派出一百五十名合
之原駐河源小堡之兵五十名共成三百名撥

給馬一百匹酌派都司或守備一員分駐於塔勒納沁其地原有昔年駐兵舊城及兵屯地畝今若令駐劄塔勒納沁之兵量為屯種更可有濟應將東北一路大小卡倫統令守備專司每年於二月初一日起照舊分佈鶯膀山三道大坂舒魯松卡等處登高瞭望每月更換以均勞逸至九月初一日撤歸塔勒納沁城則令每二日派營弁一名帶兵四五十名設立循環二籤於

圖古里克上下摩垓及各土山前後哨探循去
環來倘有賊入消息即舉放烟火一面由青山
子牛毛泉馳報哈密一面由廟兒灣克色勒延
敦從軍臺馳報安西更為便捷所有附近牧放
牲隻回民倘一時聞信晝則望烟夜則望火勢
急悉入塔勒納沁城協力堅守事緩則令同卡
兵盡歸哈密可以無虞奏入得

旨軍機大臣議奏尋議哈密為扼要之區其東北之

塔勒納沁距哈密二百餘里又東北五十里設有河源小堡卡訊上年九月內總督黃廷桂於密議防範事宜內奏稱塔勒納沁向派弁兵駐劄但形勢頗低北山一帶由上摩亥可達至哈密城由坡子泉金鉤峽可直抵橋灣則俱不能瞭見是上摩亥等處較之塔勒納沁尤要亦已各設防卡無從潛過等語是塔勒納沁之前既有河源小堡駐兵探哨而左右之上摩亥等處

又俱設有卡汎其於防範之道似已嚴密今綽爾多奏請將三堡及哈密存城兵內共撥出二百五十名合之原駐河源兵共成三百名酌派都司或守備一員分駐於塔勒納沁將東北一路大小卡倫統令專司等語自屬慎重邊防之意其所奏二月照舊分佈各卡九月撤歸塔勒納沁城循環探哨等事宜亦屬應行籌辦之事惟是哈密防兵遇有聲息惟以堅壁清野以待

援師為主今若於三堡撥兵一百名哈密城撥兵一百五十名此二處城堡之兵是否足資守禦不致單弱塔勒納沁雖舊有城垣可以駐劄而所撥之兵僅止三百又須分佈各卡存城無多設有緩急是否足以固守以為哈密犄角之勢而河源小堡為塔勒納沁西北門戶向設防兵五十名又分派於鶯膀山三道大坂舒魯松卡等處每年防冬之期則俱駐於河源小堡以

為塔勒納沁外障今若將此項兵丁一併歸入
塔勒納沁城河源小堡幾為空設即使循環探
哨終恐鞭長莫及况塔勒納沁地勢既低不能
遠瞭是塔勒納沁撥駐弁兵止可以防賊人之
潛越而西北一路則終以河源小堡為要卡不
可輕議併撤應交總督黃廷桂確按情形詳悉
籌畫妥協定議具奏奏入

上從之

乾隆十八年春正月戊寅

議派員偵察準夷情形

定邊左副將軍成衮扎布奏言欽奉

諭旨以準夷近未通使宜密加防範伏思準夷素性詭譎當廣為體察信息請嗣後五六月間派賢能台吉官員各一人以年例購買馬匹為名在烏梁海暗行偵探再喀爾喀副將軍每年於軍營四季駐班若令其在叅贊上隨內地大臣行

走學習事務亦屬有益奏入得

旨值班副將軍著在叅贊上行走餘著軍機大臣會同該將軍議奏再散秩大臣薩喇爾頗悉準夷情事若選派索倫烏拉齊帶往於軍營有益著一併議奏尋議烏梁海探信之處應如該將軍所奏至

薩喇爾前赴軍營應派索倫烏拉齊一百名再令薩喇爾於伊屬下挑選數十名並令察哈爾八旗總管於舊厄魯特等項人內每旗挑二十

餘名密行預備奏入

上從之

甲子

命兩江總督尹繼善為陝甘總督黃廷桂調補四川

總督

二月戊申

命侍郎兆惠赴藏

上諭軍機大臣曰近年準噶爾台吉喇嘛達爾扎奏

懇延請喇嘛及往藏熬茶等事朕俱未允行今一年以來未有遣使入覲之信或陰懷不軌潛圖入藏亦未可知所當密為防備今遣兆惠前往協同多爾濟舒泰辦事可傳諭多爾濟等俾其乘便曉示達賴喇嘛一切機宜務宜預為留意

三月丁巳

命四川總督黃廷桂等預挑赴藏換班官兵

上諭軍機大臣曰現命侍郎兆惠前往西藏所有駐

藏官兵如將屆更代之期應於川省各營內早為
選派預備其將領中如李中楷馬如龍輩亦即速
調數員赴省俟兆惠到時酌量帶往至現在應行
代還兵丁仍令暫留防所不必撤回應於何時撤
回聽該侍郎會同駐藏大臣酌量辦理此係預籌
密備之事不可稍涉張皇致駭衆聽可傳諭黃廷
桂岳鍾琪知之

議察核張家口等處驛站動用馬匹事宜

軍機大臣奏言管張家口等站官員奏事需用馬數月摺向貯

大內並不交部查核嗣後應令管站官員凡馳驛奏事註明月日數次動用馬匹若干月底咨報兵部理藩院互相稽核奏入報

聞

夏四月乙未

議北路備兵事宜

軍機大臣奏言乾隆七年議奏防守北路派兵
案內綏遠城一千名右衛一千名土默特一千
名八旗察哈爾二千名遇有調遣照雍正七年
例辦給又去年奉

旨令黑龍江將軍預備兵二三千名今應請再行密
飭各該處照數預備如遇調遣務令即時可以
起程毋得遲悞但現在不必過於張皇致露聲
息奏入

上從之

丙申

命尚書舒赫德散秩大臣薩喇爾赴北路軍營

丙午

侍郎兆惠等奏更代駐藏官兵事宜

兆惠黃廷桂岳鍾琪奏言更代駐藏官兵應於
本年十月起程來年正月至藏臣黃廷桂等前
奉

諭旨即密行派備並於李中楷馬如龍之外遴調熟悉藏地者數員來省臣兆惠於四月初六日至成都公同商議更代官兵共五百餘員名若同時行走不但需馬甚多且未及常期恐啓番民疑慮今臣兆惠酌帶副將李中楷遊擊馬如龍本進忠兵五十名於四月十二日先行出口約五月可到繼今遊擊紀萬年李華帶兵二百名起程於六月可到其藏內代還兵丁臣兆惠到

後與駐藏大臣察看情形再為遣發至其餘往
代兵二百五十名若於十月起行此往彼還適
際冬春冰雪應請於來年二月起行四月至藏
如蒙

俞允並請嗣後更代兵丁五百名分作二起一於本
年五月起行七月到藏一於次年二月起行四
月到藏庶新舊相間可資學習亦於防務有裨
奏入

上從之

壬子

命湖廣總督永常護軍統領努三前赴安西

先是

上諭軍機大臣曰準夷無遣使入覲之信或潛懷窺伺亦未可知安西提督王進泰係屬新任恐未必深悉情形永常在彼更事已久著傳諭永常倘至四五月尚無夷使來信伊即應馳赴安西與王

進泰協同商議防範事宜至是

上命永常及努三馳赴安西等處並給與

欽差大臣關防

五月辛巳

尚書舒赫德等疏奏防秋事宜

舒赫德成衮扎布等奏言去年三月臣等議防
秋摺內請於六月初一日起將喀爾喀西界游牧
遷移惟留十丁報事其妻子牲畜俱令在烏

里雅蘇台以內游牧令扎薩克圖汗賽音諾顏
二部落之兵駐於喀喇烏蘇其餘部落各於游
牧交界駐備十二月臣成袞扎布進京時又奏
明四部落兵一萬四千名若在游牧界上駐防
人馬口糧羊隻俱由各部落派給未免有累若
照舊在各游牧內預備則調遣即至而供應不
煩再從前防秋兵三千兵曾裁汰一千今請仍
復原數其西界所住蒙古將游牧收移進內自

可無虞經軍機大臣覆准現在傳知各部落遵
行臣等竊以預防侵軼守望宜嚴又必接濟兵
力始可策應無悞今應於五月下旬即令看水
草侍衛索拜等往西路尋踪探信六月初十日
前後防秋兵到齊將駐防鄂爾昆兵一千名調
赴塔米爾鄂爾昆中間保守城池臣等與叅贊
大臣達青阿安崇阿等帶領防秋兵徐徐行圍
進至察罕淖爾特爾奇河源等處候索拜等音

信並嚴飭各卡倫晝夜瞭望至秋季應更換號
樁時仍派人前往更換如有信息即帶兵前進
相機辦理奏入報

聞

癸未

命定議哈密派撥防兵事宜

陝甘總督尹繼善奏言哈密現設防兵二千名
除分駐各城堡及卡倫外在城止八百餘名三

堡分駐兵五百名防卡之外亦僅二百名若準
夷大隊前來未免衆寡不敵應請添兵一千名
分駐城堡在甘涼肅戰兵內每處撥兵二百五
十名其餘令安西提臣於預備戰兵內另行酌
派奏入得

旨軍機大臣議奏尋議駐防哈密之兵惟以防守為
事安西已設重兵聲援相接甘涼肅等處又均
有備戰之兵一聞信息先後出口自可協力援

勦若謂防兵不敷守禦今即添兵千名分配各
城堡每處所增仍不過百餘名豈可恃以無恐
且所增兵丁既須於備戰數內派撥是以一千
名援勦之勁卒轉令分駐各城堡為待援之人
更屬無益該督所奏應無庸議奏入

上諭軍機大臣曰尹繼善所奏本非要領朕交爾等
議奏特欲觀衆論之同否耳今爾等議駁甚是哈
密地方遼濶增兵千人於邊防何有在尹繼善本

意亦未必以一千兵遂足資扞禦不過欲以入奏
見其留心邊備耳然豈朕所望於尹繼善者耶著
傳諭知之

六月丙申

尚書舒赫德等奏報準夷信息

舒赫德成衮扎布等奏言據遣往烏梁海探信
之四等台吉班扎喇克察等密報準噶爾台吉
喇嘛達爾扎發兵往哈薩克索取達瓦齊其兵

反隨達瓦齊來擒喇嘛達爾扎現聞達瓦齊已
襲台吉臣等復遣喀爾喀侍衛完楚克前往同
班扎喇克察詢取實信據回報云我等至克木
齊克河巴顏台罕等處託買馬匹察看烏梁海
情形據貝子旗分宰桑都塔齊等告稱我等曾
見準噶爾烏梁海宰桑滿濟岱等據稱達瓦齊
承襲台吉是實現今欲往謁見又聞達瓦齊遣
使入京亦遣使往俄羅斯不知於何日起程臣

等察看此次所報信息是達瓦齊自為台吉已屬確實今仍照原議帶防秋兵行圍前進如有信息再行奏

聞再查從前西北兩路若有使臣前來俱互相知會臣等已密行知會安西提督訖奏入報

聞

丁酉

諭欽差大臣永常等西路防範事宜

上諭軍機大臣曰據尚書舒赫德副將軍成衮扎布等奏稱探得準噶爾達瓦齊戕害喇嘛達爾扎自立為台吉現聞遣使前來請安已密行知會西路軍營等語可即傳諭永常努三尹繼善王進泰等如夷使到哈密一切事宜並可照舊辦理其攜來人數貨物牲隻亦必遵照立定章程或有額外多帶即按數駁回以示節制其西路現在防範機宜務宜加意慎密不可稍露形迹致使伊等得以窺

測也

丁未

準噶爾部人美諾克來降

命賞給安插如例

戊申

恩賞進獻馬駝之喀爾喀王公台吉等

先是定邊左副將軍成袞扎布奏言現在軍營官兵需用馬駝所有喀爾喀四部落預備馬九

百匹駝三百隻僅足敷用萬一有事調遣黑龍江官兵自當預籌接濟伏思喀爾喀王公台吉喇嘛等均踴躍急公應請令其預備奏入得

旨軍機大臣議奏尋議應如所奏至是成衮扎布奏言哲卜尊丹巴胡土克圖等呈稱我等世受

國恩今當購買馬駝之時情願進馬五千七百四十一匹駝一千六百二十隻令台吉達什丕勒三都克扎卜首先交納計六月內可以全交等

語奏入得

旨應如何加賞之處著軍機大臣議奏尋議雍正十三年議賞貢獻馬駝之王公台吉扎薩克案內每駝一隻賞緞三端馬一匹賞緞一端羊五隻賞緞一端其進馬二百匹駝二百隻羊一千隻以上之王公扎薩克俱紀錄一次協理台吉加一級胡土克圖喇嘛等酌量加賞大緞臣等查從前用兵之際馬駝昂貴故計數加賞今撤兵

年久蒙古牲畜孳息價值平減此次進獻馬駝
應共賞官緞三千端分給衆人其進駝一百隻
馬一百匹以上之親王得親扎卜一等台吉達
什丕勒齊旺多爾濟俱紀錄一次二等台吉策
楞多岳特四等台吉巴木丕勒俱加一級此內
達什丕勒平日行走奮勉所進駝隻又多應請
加與紀錄一次哲卜尊丹巴胡土克圖加賞大
緞二十端額爾德尼班第達胡土克圖加賞大

緞十端奏入

上從之

秋七月丙辰

尚書舒赫德等續奏準夷信息

舒赫德成衮扎布等奏言探南路探信侍衛蒙
固勒等報稱我等由喀爾占和碩卡倫尋踪至
巴顏珠爾克遇見厄魯特人巴圖車林我等托
以打牲來此詢問伊現在台吉據云係達瓦齊

臣等前奏達瓦齊自立之信俱得自烏梁海之人今蒙固勒所報得自準噶爾卡倫是達瓦齊自立之事確無疑義奏入報

聞

丁巳

侍郎兆惠奏藏地防範事宜

兆惠奏言臣於五月二十八日到藏遵

旨傳諭達賴喇嘛以準夷去年無故求請喇嘛又續

請熬茶俱未允行至今未有來使殊不可信倘
潛圖窺藏亦未可定應預為防備從前準夷潛
犯藏地土伯特俱受其害又與朱爾默特那木
扎爾潛通書信意懷不軌

皇上慮藏地人不知備禦萬一有事被害不淺達賴
喇嘛當預為曉示令各保身家勿容準夷一人
入境達賴喇嘛云從前土伯特未設卡倫是以
準夷得以潛踪侵犯今各路俱派兵駐守山嶺

大而戈壁多料不敢輕來窺伺但固守封疆實
為要務謹遵

諭旨交與衆噶卜倫達綱等曉示又據噶卜倫公班
第達等稱蒙

大皇帝睿鑒土伯特情形預籌防範準夷又經達賴
喇嘛曉示查藏衛所屬兵丁二萬六千餘名倘
有信息即派選一萬三千餘名分派留駐藏地
及據守阿里那克桑騰格里淖爾阿哈雅克等

處暫將近邊游牧牲畜收近藏地斷不使準夷
獲利臣等省藏地情形益加緊慎相機戡守可
以無虞奏入報

聞

己未

議西路邊防事宜

陝甘總督尹繼善奏安西等處邊防事宜十條
得

旨軍機大臣議奏尋議據該督奏慎選安西將備一條查安西控制哈密首先應援是以領兵將備定例在外題補近又預行保舉已為慎重該督所奏現咨提臣考核揀選調補係督提等應辦之事無庸另議又挑選精銳官兵一條查甘涼安肅備戰兵丁原議預先派定每年點驗一次該督所奏逐名點視年力技勇分委大員查驗軍裝之處自應如此辦理又加意牧養馬駝一

條查該督既稱現在咨行各提鎮詳加查驗疲瘦者更換倒缺者購補並令加意牧養用心調習自應嚴飭經管將弁實力奉行又口外路徑先勘水草一條查前赴哈密援兵經由戈壁有八九站及十站不等自當如所奏預為勘明實於赴援有益又防兵宜酌帶烏槍一條查防兵更代原在無事之時賊人亦斷無越過哈密邀截防兵之理但長途千里自未便空手前往應

准其帶攜又防所鉛藥宜多為預備一條查哈
密孤懸塞外一切軍需自宜儲備充裕軍營餘
存鉛藥既統作備貯造冊其肅州所製火藥仍
按年解送之處應如所奏行又哈密兵糧宜預
為籌備一條查上年黃廷桂奏稱哈密現貯米
麥足敷防兵八年之食又楊應琚奏准於柳溝
沙河一帶動撥小麥運往則兵糧自屬有餘應
無庸再議又分貯銀兩就近酌備一條查肅州

舊貯銀三萬兩後經部議提貯甘州府庫但肅
州戰兵係首先出口應援若俟赴甘支領不免
遲悞肅州既有道員駐劄應即提貯道庫以備
撥用又哈密一帶城垣宜修理堅固一條查上
年黃廷桂奏稱該處新舊兩城均屬完繕但邊
防重鎮自以慎固為要如有應修者應令酌量
緩急分別先後陸續葺治亦不必各處工程一
時並舉轉致駭人聽聞又哈密耕種牧放宜在

附近一條查哈密為準夷扼要之地首當賊鋒
一聞信息自宜堅壁清野該督所奏回民遠至
塔勒納沁之巴達山等處耕牧者應曉諭禁止
亦屬思患預防之意但回民生齒日繁廠地有
限聚令就近恐有礙生計應令酌量遠近妥協
辦理奏入

上從之

甲子

尚書舒赫德等疏奏查閱防秋兵丁

舒赫德等奏言喀爾喀四部落防秋兵三千名
陸續到齊臣等會同將軍成袞扎布叅贊大臣
親王得親扎卜公策卜登扎卜及帶領防秋兵
王桑寨多爾濟等公同查閱兵丁俱年力精壯
器械整固馬匹亦屬臚肥又閱兵丁較射相撲
并操演陣勢進退整齊馬上放槍亦皆嫻熟喀
爾喀王公扎薩克等俱感激

皇恩甚屬奮勉應請擇水草豐饒之地令伊等牧放
馬匹暫為休息以候調遣奏入報

聞

丁丑

尚書舒赫德等疏奏撤回派備兵丁

舒赫德成衮扎布等奏言據烏里雅蘇台叅贊
大臣烏爾登解送投降之準噶爾部人烏巴什
前來臣等詢問據供我係準噶爾宰桑屬下人

我姑母曾經乳養阿克布魯爾乃台吉喇嘛達爾扎之族因得親隨行走喇嘛達爾扎係噶爾丹策零外婦所生從前策旺多爾濟那木扎爾被害時尚存幼弟蒙庫什有台吉達瓦齊及阿睦爾撒納等欲立蒙庫什遣二宰桑前往蒙庫什處為喇嘛達爾扎所覺與蒙庫什俱被害達瓦齊等逃往哈薩克喇嘛達爾扎發兵追索不獲哈薩克汗阿布賚向達瓦齊言此地恐不能

相容達瓦齊遂與阿睦爾撒納率所屬乘間逃
至舊遊牧地會兵四百人沿途收集以兵扼闡
勒奇山嶺十一月二十七日黎明猝至喇嘛達
爾扎處焚其廬帳喇嘛達爾扎為阿睦爾撒納
射傷身殞達瓦齊自立為台吉凡喇嘛達爾扎
親信以次誅戮又聞達瓦齊自立後嗜飲無節
復與阿睦爾撒納相失我於亂後隨衆藏匿今
逃出來降等語查從前所得達瓦齊立為台吉

之信業經節次奏報今得烏巴什所供益屬詳
悉臣等前已傳諭近邊各處遷移游牧其四部
落派備兵丁俱裹帶五十日口糧前赴游牧邊
界防守現在達瓦齊自立之信既確復奉

諭旨以準噶爾正當有事之秋達瓦齊一身未定何
暇窺伺仰見

聖明遠燭目今將屆八月阿爾台山梁正值降雪之
時準夷歸途不便自難深入似宜休息兵力將

派備兵丁於八月內量其遠近陸續撤回向內
遷移之衆亦令各歸原處游牧奏入報

聞

戊寅

命尚書舒赫德散秩大臣薩喇爾回京

庚辰

命欽差大臣湖廣總督永常回任護軍統領努三回

京

八月癸未朔

議安西等處備戰兵丁馬匹

永常奏言安肅等七標戰兵雖有一萬五千六百名而迅速趨戰全在第一撥戰兵九千名官兵一人二馬加以保護輜重則實在備戰者僅六千有餘兵力稍為單弱請酌量變通減為二兵三馬安標戰兵三千名可餘馬一千五百匹再於額兵內加派五百名將餘馬通融撥給一

同前往可壯先聲其肅甘涼第一撥六千名亦照數減馬即以給二撥戰兵為應援後勁奏入得

旨軍機大臣議奏尋議赴援進剿非馬有餘力則赴敵稍援即增兵亦屬無益從前議定之數係按兵撥馬非照馬派兵今永常所奏雖為增兵起見但各處前赴哈密之兵遠者二千里近者尚數百里若於二兵之內頓減一馬長途疲乏倒

斃勢難如期赴敵況所增者不過戰兵五百彼
若以偏師綴我則第一撥戰兵九千已足扞禦
若傾巢而來自必待各處官兵畢集原不僅藉
此五百之兵以壯聲威臣等酌議應仍照原議
調撥奏入

上從之

戊戌

命侍郎兆惠回京

甲辰

欽差大臣永常等奏報準夷信息

永常等奏言臣等巡查哈密至東大坂有準夷
部人伯勒克攜眷來降臣等詢問準夷信息據
供上年喇嘛達爾扎為台吉時疑達瓦齊有反
意欲誘至伊犁加害達瓦齊不肯前去喇嘛達
爾扎即遣宰桑鄂什爾索諾木二人帶兵往拏
達瓦齊帶領所屬欲投哈薩克為追兵所截僅

率百餘人內有塔爾巴噶台頭目阿睦爾撒納
一同投入哈薩克喇嘛達爾扎遂將阿睦爾撒
納部衆分給衆人一半給與阿睦爾撒納之兄
沙克都爾又將達瓦齊家眷拘至伊犁省守遣
人向哈薩克索取達瓦齊哈薩克不與隨派宰
桑賽音伯勒克及訥默庫濟爾噶爾二人帶兵
三萬往拏哈薩克恐懼欲將達瓦齊等送出達
瓦齊聞知即同阿睦爾撒納並原帶之屬人潛

至舊游牧處將沙克都爾殺害收服衆人至千
餘名遂直趨伊犁喇嘛達爾扎聞知遣宰桑圖
魯庫烏克圖鄂什爾博第四人挑兵迎戰兵未
挑齊於途次遇達瓦齊圖魯庫及烏克圖二人
即行投降鄂什爾及博第不肯為達瓦齊所殺
去年十一月二十七日到伊犁將喇嘛達爾扎
殺害達瓦齊自立為台吉訥默庫濟爾噶爾旋
亦歸順賽音伯勒克潛逃又被擒拏達瓦齊將

從前原管地方人衆給與阿睦爾撒納等語奏
入報

聞

九月壬申

命欽差大臣永常為陝甘總督尹繼善調補江南河
道總督

平定準噶爾方略前編卷五十四